

■ OPINIUNS

Ina tut outra posiziun concernent la «Resoluziun dalla Surselva Romontscha»

(da betg vulair rinforzar il rumantsch grischun)

publigrada en La Quotidiana da glindesdi, ils 30 da matg 2016

1. Nus, ina Rumantscha ed in Rumantsch independent, sustegnain tuttas finamiras constructivas per rinforzar il rumantsch.

2. Nus na dictain betg e na laschain er betg dictar tge stentas ch'èn da promover ubain da refusar.

3. L'uschenumnà «pievel rumantsch» na datti betg en furma cumpacta. I dat en tuttas regiuns differentas opiniuns davart il svilup da noss linguatg, er en Surselva. Pia na represchenta la Surselva Romontscha (SR) per da bler betg l'opiniun da l'entir «pievel romontsch» en Surselva.

4. Fortifitgar il rumantsch grischun (rg) rinforza er ils idioms ch'èn las ragischs dal rg. En l'entira istorgia dal rumantsch n'ha nagut dà a noss linguatg uschè ferm

impuls ed ina preschientscha uschè considerabla sco quai ch'il rg ha fatg. El ha dà vita al moviment rumantsch, in moviment (sco la vita senza) caracterisà d'engaschi e d'ideas, da dispitas e discordias. Quai che vegn numnà da la SR «la pasch linguistica contonschida ed acquistada aschamein» è tenor la vista da bleras Rumantschas e blers Rumantschs plitost stà in agir cunter la buna fai cun betg sa tegnair vi da cunvegna.

5. Senza la funtauna linguistica dal ple-dari grond en rg, accessibla en l'internet gratuitamain, cun nundumbraivels plects novs or da tut ils secturs da la vita, na fissan ils singuls idioms betg pli abels da s'adattar al linguatg dal mund modern. A lunga vista, suenter duas u trais generaziuns, savess il rg pia tuttina daventar il linguatg da scrittira da tetg per tut las Rumantschas ed ils Ru-

mantschs, senza periclar il diever dals idioms e senza chaschunar novas gueras linguisticas.

6. Enstagl da far mirs enturn curtgins isolads intimain nus la Lia Rumantscha da tegnair en mira ina tala visiun. E plinavant intimain nus la Lia Rumantscha da promover ina cultura da conflicts en in spiert da fidanza vicendaivla che n'è betg signà da fundamentalissem, mabain d'ina tenuta da laschar viver e prosperar tant ils idioms sco era il rg. En quel grà èsi nizzaivel da ponderar bain nua che in fa senn e nua l'auter. Ed igl è da resguardar realitads e capacitads persunalas, linguisticas e finanzialas.

*Maria Cadruvi, Ruschein,
commembra da la SR enfin la fin dal 2013
Hans Caprez, Castrisch, commember da la SF
(che n'è per motivs da termin betg stà
a la radunanza generala a Falera)*